

lis Gnovis

■ **GURIZE.** Il percorsi fotografic di Roberto Kusterle

E je stade sprolungjate fintremai ai 13 di Novembar la mostre «Kusterle Compendium», ch'è je la prime esposizion antologjiche dedicate al fotograf gurizan dal 1948 Roberto Kusterle. La rassegne e je imbastide li di palaç Attems Petzenstein. I curadòrs, Angelo Bertani e Alessandro Quinzi, a àn sielzût 230 oparis (ancje ineditis) fra chês realizadis dai agns dal Otante dal secul stât fint in di vuê, compagnant lis fotografis cun pituris, dissens, sculturis, instalazions e videos. Vie pal mès di Otubar, l'artist al compagnarà i aventòrs intune visite guidade, ogni martars a 18. Al percorsi creatif dal fotograf al è dedicât ancje un «podcast», ch'al pues jessi scoltât a la direzion: <https://bit.ly/3oTslD3>. Par informazions: musei.erpac@regione.fvg.it - 0481 385335.

■ **SPILIMBERC.** Cuintri la crisi climatiche e il presit de lûs

«Grafica Veneta», l'industrie di Padue ch'è je calcolade fra lis stamparis plui impuartantis in Italie, si svante ancje di jessi la prime aziende mondiâl «carbon-neutral», al ven a stâi buine di garantî un ecuilibrî fra emissions di gas sidrere e assorbiment. L'obietif al à stât otignût realizant, tal teritori comunâl di Spilimberc, un parc fotovoltaic sù par jù cun 40 mil panei suntuone superficiei di 100 mil metris cuadrâts e cuntun investiment di 15 milions di euros. «Grafica Veneta», cul so implant imbastît dal 2014 là ch'è jere la caserne di Vacil, e rive adore di produci passe 13 milions di kwh.

■ **UDIN.** Rinovât il Diretif di «Aclif»

In spiete che «l'obietif di vé un riferiment istituzionâl gnûf pal Friûl» al deveni – cemût ch'al à bramât il president dal Consei regionâl, Piero Mauro Zanin – la «Comunitât linguistiche furlane» («Aclif») e larà indevant cul so impegn par che il furlan al sedi doprât simpri plui te comunicazion publiche e private, te scuele e tai «mass media». La cuistion e je stade frontade ai 4 di Otubar, a Udin, intant de assemblee dai Cumons di marilenghe furlane. I 138 Ents locâi notâts in «Aclif» a àn rinovât il Diretif (te foto), confermant dute la scudade dal president Markus Maurmair, sindic di Volesson e di Darzin; Ornella Comuzzo (assessore di Tavagnà), Daniele Sergon (sindic di Caprive) e Alessandra Vanone (assessore di Tressin). Uniche novitât, Gianluca Casali, sindic di Martignà, sielzût par dâi la volte a Alessandro Marangoni (sindic di Dertigne).

■ **VIGNESIE.** Sgarfant tes lidris dal mît

Ai 4 di Otubar, il Dipartiment di Studis umanistics de Universitât «Ca' Foscari» di Vignésie i à dedicât une zornade di studi a Maria Grifoni Savorgnan. In plui di jentrâ te storie des Letaris pal «carteggio d'amore» sgambiât cun Pietro Bembo, la nobildone e je a part dal cês de divignince furlane dal mît di «Romeo and Juliet». «Giulietta & Romeo in Friuli», la «Newsletter» curade cun passion di Francesc Frattolin di San Micjêl, e marche che Maria Grifoni Savorgnan e jere la mari di ch'è Lucine Savorgnan (1492-1543) protagoniste dal amôr disfortunât cun Luîs Da Porto (1485-1529) ch'al ispirà William Shakespeare (www.associazionegiuliettaeromeoinfriuli.it/ - <https://comitatogiuliettaeromeoinfriuli.wordpress.com/>).

Miercus 12	S. Serafin
Joibe 13	S. Edoart
Vinars 14	S. Calist pape
Sabide 15	S. Taresie di Avile

Domenie 16 XXIX Domenie vie pal an	
Lunis 17	S. Ignazi di Antiochie
Martars 18	S. Luche
Il timp	Zornadis serenis



Il soreli
Ai 12 al jeve aes 7.20 e al va a mont aes 18.27.



La lune
Ai 17 ultin cuart.

Il proverbi
Puare ch'è cjase dulà che si viôt a frizi e a roseà dut intune zornade.
Lis voris dal mès
Tal zardin spedaît i sterps, taiât i scarts par coltâ o par fâ foiêt.

Altris trois no 'nd è

La pandemie e la vuere no àn di fermâ «Agjende 2030»

Cence un implant gnûf di svilup, consums conciliâts cu la salût dal Marimont e mecanisims economics che no fasin cressi lis disparitâts sociâls e che no lassin nissun indaûr, ogni discors di «sostenibilitât» a son cjaris: nol è ni tenar ni adatevul il «Rapporto Asvis 2022», ch'al scrutine «L'Italia e gli Obiettivi di Sviluppo Sostenibile», verificant pont par pont il nivel di aplicazion de «Agjende 2030» des Nazions Unidis e dai siei 17 «Goals/Obietifs».

Vie pal 2021 o vin cridât «Chivali» – a scrivin i esperts de «Aleance taliane pal svilup sostenibil» –, passât un altri an, o scugnin infuartî chel «Chivali»: Il timp ch'ò vin a disposizion al è daûr a finî: o vin d'incressi l'impegn par garantîsi un avign sostenibil e ancje par screâ stradis gnovis.

La presentazion dal scandai anuâl di «Asvis», ai 4 di Otubar, e à screât l'edizion pal 2022 dal «Festival dello Sviluppo Sostenibile», ch'al larà indevant fintremai ai 20 di Otubar. Centenârs di iniziativis, in ogni region taliane, a procuraran di «sensibilizâ e di mobilizâ citadins, zoventût, impresis, clapis e istituzions su lis problematichis di sostenibilitât economiche, sociâl e ambientâl». In Friûl, daûr dal lûc internet de manifestazion, i apontaments programâts a saran 8, fra Cjanive, Gurize, Palme, Pavia, Spilimberc e Udin (www-2022.festivalsvilupposostenibile.it/tutti-gli-eventi/). Tomant al quadri disegnat dal «Rapporto Asvis 2022» (ch'al pues jessi let su la rê des rêts, parie cuntun decalic di propuestis operativis, presentadis ancjemò prin des votazions dai 25 di Setembar; <https://asvis.it/rapporto-asvis-2022/>), il document coletif al partîs dai stralencs multiplicâts de pandemie e da la vuere: «I zirucaments a son tancj, a son masse», cundut che l'Italie e à rinovât parfin la Costituzion, par adatâsi ai principis



Il «Rapporto Asvis 2022» al pant la strade di fâ par meti in vore «Agjende 2030»

Publicât il scandai «Asvis» su la sostenibilitât economiche, sociâl e ambientâl

de «Agjende 2030», zontant i principis de sostenibilitât e dal ecuilibrî intergenerazionâl tai articui 9 e 41.

Un struc de situazion al è proferit a pagjine 7 dal scandai «Asvis»: «Fra 2010 e 2021, si registre mioraments par 8 «SDGs» («Sustainable Development Goals»): Alimentazion e Agricoltura (Goal 2), Salût (Goal 3), Educazion (Goal 4), Paritât di gjener (Goal 5), Sisteme energjetic (Goal 7), Inovazion (Goal 9), Consum e produzion responsabii (Goal 12) e Lote cuintri de crisi climatiche (Goal 13). Al spiche un peiorament gjenarâl par 5 «SDGs»: Puaretât (Goal 1), Aghe (Goal 6), Protezion dal Ecosisteme terest (Goal 15), Istituzions stagnis (Goal 6) e Cooperazion internazionâl (Goal 17). Biel che la situazion e reste stabil par 4 «SDGs»: Cundizion economiche e lavôr (Goal 8), Disparitâts (Goal 10), Citâts e Comunitâts sostenibils (Goal 11) e Protezion dai Ecosistemis marins (Goal 14)».

Plui intrigôs al risulde il confront cu la cundizion di prin da la pandemie. In

chel cês, vie pal 2021, «l'Italie e mostre di jessi miorade dome in doi Goals (7 e 8). Par altris doi (Goals 2 e 13), si conferme il nivel dal 2019. Par ducj chei altris «SDGs» (1, 3, 4, 5, 6, 9, 10, 15, 16 e 17) il nivel regjistat vie pal 2021 al è ancjemò sot di chel dal 2019, confermant che il País nol à ancjemò no superât i efets negativis causonâts de crisi pandemichis».

Mario Zili

Messe par furlan

A Udin, la Messe par furlan e ven cjantade sabide ai 15 di Otubar a 5 e mieze soresere, li de capele «de Purità», daprûf dal domo (cun Radio Spazio che le trasmet sul moment). E compagnarà la celebrazion la corâl di Sante Marie la Lungje. Al cjantarà messe pre T. Cappellari.

Tradizions furlanis dal mès par cure di Mario Martinis

DECIMIS E CUARTÈS

Finit il timp des vendemis e de ricostituzion des scortis alimentârs, l'om de campagne al inmaneave une schirie di usancis di «impen comunitari» par regolâ i conts e onorâ prestis e debits. Cussî te mieze Sierade, timp di conferme o anulament dai pats agraris dentri de fieste di Sant Martin (11-XI), al predi i vignive dade la «paie», fate di decimis e cuartès.

Fintremai tai agns Cincuante dal Nûfcent e vignive paiade la decime, che e jere la decime part nete dai prodots tirâts sù te anade agrarie e consegnade o al paron, o al siôr dal feut, o al stât, o ae glesie. Lis decimis eclesiastichis si dividevin po in cuatri parts (Vescul, puars, manutenzion de glesie, sostentament dal clericât) e cussî une part, che e corispuindeve ae cuarantesime de racuelte, vâl a di il cuartès, e



lave al predi.

Chest antic viersament, come ogni altre ufierte, fin a cualchi desene di agns indaûr al jere fat in forme di prodots de tiere come forment, blave, farine, patatis, fasûi e vin, che secont lis usancis dai lûcs a vignivin puartâts in forme ancje cerimonial in canoniche, in sagristie e ancje daûr dal altâr maiôr (a voltis parfin tal cimitieri come che contin antighis cronachis) jenfri la fin di Otubar e la fin di Dicembar.

Tor dai agns Setante dal Nûfcent, cuant che cheste «paie» e jere diventade plui che altri facultative, il valôr che al corispuindeve ae cuote dal prodot de tiere al vignive dât in bêçs, intant che plui di resint e je stade istituide la «buste» pe ufierte libare che ogni famee e ufriave al plevan.